

學

福

齋

詩

集

詩緣情而易工學徵實而難假公羊傳詩者什之九
俯首而孜孜於學者什曾不得一焉習俗移人轉相倣
倣卽推之千百萬人而猶不得一焉豈非蹈虛者易爲
力徵實者難爲功乎間嘗遠引三百取其略可曉者而
論之楊柳雨雪便成瑰辭一日三秋動參妙諦風人之
致小雅之材茂矣美矣若夫歛幽以紀風土涉渭而述
艱難緝熙宥密參性命之精微格廟饗親通鬼神之嗜
欲斯時情窒而理不得伸意窮而辭不得騁非夫官禮
制作之手大雅宏達之才純懿顯鑠蜚英騰茂固未易
勝任而愉快也故曰三百篇之中有詩人之詩有學人

之詩何謂學人其在於商則正考父其在於周則周公
召康公尹吉甫其在於魯則史克公子奚斯之二聖四
賢者豈嘗以詩自見哉學裕於已運逢其盛雍容揄揚
而雅頌以作經緯萬端和會邦國如此其嚴且重也後
人漸昧斯義勇於詩而憚於爲學思義單狹辭語陳因
不得不出於稗販剽竊之一途前者方積後隨朽落蓋
卽其甫脫口而卽寓不可終日之勢散爲飄風鬼火者
衆矣余特以學之一字立詩之幹而正天下言詩者之
趨而世莫宗也或有詰余者曰鴻儒碩學代不乏人漢
之服鄭唐之賈孔未聞有名章秀句流播儒林度其初

亦必執管而爲之蹇拙不悅於口耳遂輟而不爲則學
適足爲詩之累詩人之不盡由於學審矣余應之曰固
也自昌黎有讀書萬卷專以爲詩之譏而李殷在唐究
無一詩可傳則子之說伸矣少陵下筆有神而乃云讀
書破萬卷則子之所云非篤論也自滄浪有詩有別材
不關學問之說江西之派盛於南渡而宋弱永嘉四靈
之派行於宋末而宋社遂屋然則詩非一人一家之事
識微之士善持其敝擔斯責者固非空疎不悅學之徒
所能任矣華亭沈沃田先生其今之詩人之硃石乎於
書無所不讀於學無所不窺吾與之共學窮年累月而

不能究其底蘊吾與之共爲詩胸喘膚汗而不能儀其步趨伏而思寤而歎曰今之人奉之以詩人則羣然喜目之以學人則疑信相半而不敢居沃田之不欲自居於詩人審矣舉世方斷斷被之以詩人之名沃田不能卻也余之交沃田也置其詩於不論從舉世波靡之中震而別之爲學人得一知已可以不恨沃田數十年力學之苦心與數十年學詩之微旨得余一言而定矣沃田有詩數千篇敦余序者數矣余時過而後學其失一學詩而又不成其失二具此二失而欲論沃田之詩宜其逡循而不果也然而甘苦疾徐之故喻之最深使余

序他人之詩容有不合以之序沃田之詩則無不合也
使他人而序沃田之詩容有不當而以余序沃田之詩
則無不當也而沃田且曰目吾以學則吾豈敢若詩則
吾固有所受矣

乾隆丙戌日長至泰亭老民杭世駿序

學福齋詩集目錄

卷首

花朝賦

月夕賦

卷一

策衛詩鈔四十四首

卷二

脩門詩鈔四十首

卷三

嗽荔詩鈔六十二首

卷四

嗽荔詩鈔四十七首

卷五

嗽荔詩鈔四十七首

卷六

嗽荔詩鈔五十六首

卷七

嗽荔詩鈔二十九首

卷八

嗽荔詩鈔三十一首

卷九

西泠詩鈔二十四首

皖江詩鈔九首

莢蘭詩鈔三十八首

卷十

近遊詩鈔五十一首

卷十一

近遊詩鈔六十四首

卷十二

百一詩鈔三十八首

卷十三

百一詩鈔五十八首

卷十四

百一詩鈔六十六首

卷十五

百一詩鈔五十二首

卷十六

百一詩鈔三十六首

卷十七

百一詩鈔三十首

卷十八

百一詩鈔五十三首

卷十九

竹西詩鈔五十七首

卷二十

竹西詩鈔二十九首

卷二十一

竹西詩鈔四十一首

卷二十二

竹西詩鈔四十一首

卷二十三

竹西詩鈔四十六首

卷二十四

竹西詩鈔四十一首

卷二十五

竹西詩鈔五十七首

卷二十六

竹西詩鈔三十三首

卷二十七

竹西詩鈔三十六首

卷二十八

竹西詩鈔三十一首

卷二十九

竹西詩鈔三十首

卷三十

竹西詩鈔三十八首

卷三十一

竹西詩鈔二十一首

卷三十二

竹西詩鈔三十五首

卷三十三

竹西詩鈔三十三首

卷三十四

竹西詩鈔三十首

卷三十五

竹西詩鈔三十三首

卷三十六

竹西詩鈔三十首

卷三十七

竹西詩鈔二十四首

學福齋詩集卷首

雲間 沈大成 學子

花朝賦

潘安仁爲河陽縣旣到官政平人和端居無事迺於境
內徧植花木明年二月之望百花盛開紅紫交映於是
折簡肆筵置酒花下舉杯而屬客曰客亦知花朝之說
乎世之以二月二日若十二日者當之皆誤也今茲之
望居春之中晝夜適均萬彙馮生此青帝布德行令陽
和徧地之時也請爲諸君賦之曰

伊中春之三五兮啟天地之秘房曰遲遲其若醺兮風

習習其載揚猗仙夷之乘時兮粦纓繡於羣芳承跼鄂
以相媚兮蔚雲霞而飛翔鬱枝葉之扶疏兮錯五色其
含光近攢立以叢駢兮遠盱眙而青冥旣重葩以殢葉
兮亦交柯而挈莖秩九品而錫九命兮躋植物於天閭
憂金鈴以爲護兮樹彩幡而周防揆生朝於茲日兮班
花歷於東皇相芸芸於下土兮洵行樂之萬方若乃貴
家右族七相五公樂肆二八食列鼎鐘陟池臺以臨亭
榭爛萬紫與千紅百鳥嚶其和鳴芳菲接乎簾櫳對良
辰而高宴非戚晚其疇同至如王愷錢埒石崇金谷西
蜀王孫東京豪族開千頃之廣渠起萬間之華屋蔭奇

花蕤異卉采芙蓉獵芷葍移春臺於平畦侈游賞之未
足雕良玉以爲欄裁美錦而成幄若夫邊烽靜息幕府
燕閑營細柳以校士沼蓮花而延賓沈水香凝兮畫戟
柘枝音泛兮冰弦豔奪海棠之城障接木瓜之戍當茲
辰而公讌粲百花之欲然至乃陌上游人萋萋草熏緋
桃如笑兮瞰墻頭綠楊絲絲兮腕繡鞍滿城競出土女
翩躚尋橦卓兮捷猿猱秋千騰兮騫彩鸞陳百戲而兼
水嬉兮助是日之壯觀又若去客宅鄉淹于逆旅羗夷
猶以未行久威遲而不去阻重關暨大河望故鄉兮延
佇坐春寒兮寂寥滴蕭蕭之暮雨喜今朝之晴明覩花

枝之如許雖拊時而驚心亦色飛而眉舞又如莘莘行
子遵彼道塗越原隰及岡巒虞我馬之或瘠聽鷄鳴而
欲起指夕陽而馳驅雜花掩映羣鳥亂呼念時序之轉
轂兮悵佳日之又孤宅若鼓篋書生鉛槧經師荃分陰
之是惜恒矻矻以在茲扇游蠶以逗窗牖墮飛花而點
硯池感蛾術之宜力寧虛嬪夫良時更有繡經居士止
靜禪和或放花之梵志或散花之維摩或結願於陀利
或釀酒於脩羅泯香界之羣有當芳晨其云何下有吳
姬越豔衛女秦娥當牕理曲挾瑟按歌輟鍼綫於閨中
彈雲鬢之雙鴉憶橐砧之在遠緘紅豆於疏麻傷玉關

之望斷剋歸期之無涯入園林而踟躕媿向榮於芳華
于是賓友懽甚起而長歌曰彼美人兮佩宜男頽茱萸
兮采護草培蘭圃兮治蕙畦東方晞兮日杲杲又稱歌
曰花有芳兮香襲衣日之暄兮揚春暉佳期不可失兮
愛景光而崇令徽

月夕賦

庾元規奉命出鎮武昌始建南樓爲賓佐游燕之所于
時律移南呂序屬中秋駿烏匿曜素魄流天軍府多暇
幕下之士相與敷衲席移觴弦會於茲樓之上庾公後
至羣然起避公曰此月夕也老子于此興復不淺遂亦
入坐舉白酒酣援筆而賦之曰

猗圓景之縣象兮實稟德於陰精歷黃道之內外兮分
晷緯於九行一晝夜越二萬六千兮徑千里以爲形御
望舒與纖阿兮趨玉兔而騎蟾蜍注銀河以倒瀉兮玉
津溢于方諸朏魄朏之隱見兮會曜靈於碧虛高在

天而爲使兮下在地而爲神青桂蓂蓂兮影婆娑白雲
浩浩兮沒半輪彼羿妻之竊藥兮說荒唐而不倫茲中
秋之令夕兮泛穆穆之金波啟廣寒之宮闕兮願乘風
而謁帝庭陟太微以循紫垣兮拂天街之列星是以同
此明月觀者各殊僕請陳之以爲客娛若乃岱華之巔
瀋霍之頂匡廬武夷之區羅浮峨嵋之境岡巒錯互巖
壑深迴聳千尋之赤嶠開萬丈之翠屏歛微雲于天末
光皎皎而出嶺承半匳于山坳飛長空之鏡影損吟風
以更清鶴警露而轉靜增中宵之沈嶢懔秋氣之送冷
至若出巫峽下巴邱齧赭圻吞荻洲吐納萬里駭浪奔

流驂川后與湘斐驅岷精而扶陽侯風定波息載沈載
浮較城野而廣大羗澄澈以懸秋飛漁父之孤笛發涉
人之權謳挹清景於此夜窮幽賞於蘭舟更有於廓靈
海浮天無岸洩湫沆瀣漻漻滄溟漫漶百谷之朝宗張千
檣而竝進轉呼吸于天關來潮汐之有信當下碇而逢
之搖碎金以奔趁企三山之非遙覺蓬萊之可近呼長
年以其醉洵勝覽之所罕或乃鑑湖之曲峭湖之陰西
湖之畔太湖之心浴積翠於瀟淪象罔曷測其淺深引
船孃之妍倡昶旻師之清音沿流光以裴裒沃沆瀣于
幽襟于斯時也弭畫楫鼓素琴翠珍飫瓊醴斟撫時序

之推遷驚急節之駸駸幸清夜之可游感紈扇之難任
虞東方之將曙鷄喔喔之不禁又若長空雨過碧天如
沐掩星欲無穿雲偏速與夫嚴冬風緊積雪乍霽晶采
交瑩一白無際更若池館孤清木葉微脫初露林間幽
意可掇它如雜花盛開一枝低亞常儀若來益助嬌妍
倘有淹留異方栖止旅店獨躑躅于中庭對素規之可
鑑又或征人在塗襆被曉行顧仄景之將落隱歷歷之
玉繩更或飲馬長城荷戈絕塞念匏瓜之無匹曠搏搏
之彌載況乃楚姬罷舞秦女卷衣覩依依之入牖將脈
脈而闕惟此人皆有別離之緒宋漠之思安得不望明

月而結軫度佳夕而銜卮者乎于是賓佐皆起實爵爲
壽曰美哉茲賦請繼爲明月之歌歌曰明月皎兮生東
方牽牛負輓兮參旗揚歡樂極兮夜未央又歌曰居戚
晚兮備台司出入密勿兮蒙主知願持盈而保泰兮永
福祿以膺之

學福齋詩集卷一

雲間 沈大成 學子

策衛詩鈔

癸丑春初余有四方之志黃遐齡上郡祖餞卽席
留別

一笑出門去飄然萬里行故人知遠別把酒話深更小
驛晴山滿長江春水生明當懸片席先過石頭城

與金匱秦樹峰上元張月丹震澤顧仔能錢唐汪
脩之夜飲

知已無多在相憐逆旅中關河三歲別風雨一尊同深

樹春陰綠小窗燈燭紅重來佳麗地莫使酒杯空

將遊中州由七里洲渡江之浦子口作

初日隨波湧茫茫露氣沉千帆收浦口一埭落江心春
逐征塵老愁因酒病深梁園詞賦地此去幾知音

磨盤山

一上高岡攬大荒淮南近在斗牛傍橫天峭壁迎人斷
夾道飛泉送客涼草擁馬蹄迷去路風翻鴉背閃斜陽
艱難獨向長安去回首吳雲淚萬行

渡淮

箭激長淮飛百里春雲淅淅卷寒潮兩山東水撫夷慙

隔岸兩山對出水勢尤險蘇詩所謂兩山控吾前吞吐久不暇也
大編乘風賈客驕
皆自正陽關者地近中原多戰壘天低平野有嚴譙
過淮
即懷遠縣吳兒舟楫生來慣夜靜猶驚魂夢搖

懷遠逆旅示同行李舒之

日日東風動地鳴無端逆旅送春行尊前翦燭驚栖燕
門外吹簫喚賣餠賺我重衾千里夢惱人曉寺廿年情
酒間偶話如何同作他鄉客偏向天南百感生
余之此行有迫
晉中舊遊然者

蒙城曉行

一夕荒城漏倍長又聽門外馬蹄忙蹇驢戀棧爭餘豆

倦客呼燈束舊裝市柳烟含新綠細林花風撲亂紅香
春光九十征塵裏伴我天涯賴玉觴

連日宿店
惟有沉醉

亳州旅次武功馬思山貲外出餞城南牡丹園卽

席賦別

駐馬譙南獨問津故人載酒出留賓繁花過眼三春雨
舊事驚心百戰塵淮水大波含滉漾楚山積氣失嶙峋
相逢便作匆匆別不惜今朝醉吐茵

扶溝道中觀廟市演劇

路入中原拂柳枝殘春烟景正迷離雨昏小市樂公社
風滿靈旗聖女祠扇底紅牙翻法曲陌頭繡幃映明姿

香塵十里扶溝道斷續車聲有所思

題山中亭子

二室如相暱含情向草亭日臨平野白雲逼遠天青林
密禽聲鬧山深虎氣腥誰爲呼玉女沉醉踏明星

入逍遙谷遊景氏園亭

別墅藏深谷雙扉盡日關穿雲遊客倦采藥野人閑晴
瀑飛千樹春禽響一山百年植喬木寂寞對烟鬟

少林寺

初祖傳衣地莊嚴占一峰嶽雲晴入寺山月夜沉鐘林
僻來枝鹿渾深臥毒龍巨姦遺墨在吾欲洗芙蓉

寺有宋蔡

京書面壁
二大字

龍潭

神物此蟠踞青天亦晦冥一泓蓄風雨二室走精靈往
代投金簡行人拜石亭韓公有題記仔細老龍醒

韓昌黎遊

此爲雷雨所悸
作記以戒後人

石淙感賦

金輪臨御日避暑此頻來輦道孤花在離宮落照開衣
冠誰健者粉黛自雄才革命由房闥天心亦可哀

登中天臺

積翠中天起諸峰北面多重雲開二室斜日滿三河握

節神官下吹笙帝子過自來封禪地御氣繞巖阿

孩兒魚

魚身而人形緣木捕之急最憐風雨生呱呱林中泣

澗蟹

小蟹石爲穴雙螯利如斧置之尊俎間縱橫思用武

山鷄

尾垂如人長斑斑發光澤中林有網羅取飾壯士幘

畫眉

畫眉飼百蟲入夏毛羽改朝夕伴吳兒終帶北音在

代書寄內

丈夫事四方安能老蓬戶歲儉集百憂無以謀甌甔舍
子出門來擔囊去故土洪波狎魚龍空村逐豺虎匆匆
客金陵十日醉江滸憶初去家時三月擬齊魯夏盡尚
陽城人事偏多迂生年過三十著鞭已媿祖每驚虞羅
嬰時受擗揄侮笑然萬里行根觸在逆旅客子旣畏人
發語首頻頻留滯忽天中朝莫聽衙鼓置我高齋內爲
我治環堵少室翠萬尋流景媚廊廡主人旣好文謂徐訪師
明嘉賓粲可數尤愛是袁絲謂約高才振三古閭左舊
相隣肝膈堪一吐呼童羅酒漿酒酣狂起舞有時聯篇
章雄健劇李杜豈惟滌旅愁可以掃塵腐獨思故鄉中

饑饉慘如睹之子無米炊何能久撐拄望遠懷間風織
作燈前雨嬌兒索餌養啼笑應無補子寧不愛惜躊躇
或成怒願子勿怒兒媿者兒之父

雨後

雨後天如沐重陰豁畫屏樹留殘照白城納遠山青客
意耽岑寂吟情託杳冥誰攜一尊酒來共醉無醒

去登封日與袁約之詩

遊子意不愜晨發詣

帝鄉

帝鄉道路長濁河連清漳我行出北門故人挈壺漿執

手話不休躑躅迴中腸曰此觸炎暍朝夕慎周防下馬
拜故人淚落沾衣裳人生感離別況復在異方僕夫促
星駕回首白日藏去去卽長路努力愛景光

鄭州道中

躑躅失重山平原豁溱洧盛夏朱光烈厚土氣如燬往
來征途間病暍何累累轆轤鳴前村新汲清且泚我馬
亦奔騰搖轡不能止喟焉傷人心觸熱憊如此安得蘋
末風飄忽甦萬里

滎澤過黃河

黃流下伊闕其勢吞洛京滉漾混二氣浩蕩走百靈古

來無上策一堤倚長城歲時集丁男版築喧雷霆惜哉
輦金錢向此洪波傾

今皇握乾符至德格元冥河伯出獻瑞靈貺昭澄清舟
楫信所適魚龍寂無聲吾欲鑱底柱作詩銘成平

衛輝府

翳翳頽陽景照此征人裾矯首指高城逝將入殷墟殷
墟臨大河晚市陳衆魚師干悵已矣元祚淪須臾皇皇
我宣聖擊磬非自娛元音旣寂寞滯聲紛楊莠至今聞
巷間寒女意態殊

淇縣

陸行畏毒熱夜半俶我裝角角野雉鳴遠林耿月光
浹旬不停筴及此暢微涼前行渡淇水欲濟川無梁
清波沒馬蹄聊以褰征裳是時天久霽露氣亦微茫
向曉東方晞羽蟲羣飛揚側聞此多竹萬畝森篴簞
我來問土人枯盡委道傍終然謝天伐或能來斧斨
黔雷有乘除物生安得常

彰德府

魏氏昔全盛萬乘此移都迴風結遠埃飛蓋塞路衢
公子夜召客珠玑府中居斐然陳衆製意欲姬唐虞
炎精猶在宥結綬趨當塗大義棄若遺詞章亦焉須
嗟嗟黃

初聞諸子一何愚我懷管幼安遼海有真儒

渡漳河

漳河儲濁流奔決唯所向元氣太行來蓄極乃一放
滌積盛夏大聲起新漲斯須失高原鱗介湧異狀客來
問船人振舵色愀愴偏側局艙中顛簸虐風浪羣驚馬
尾銜或憂魚腹葬伊余苦風沙翻覺耳目曠高帆餓鴟
鳴萬弩激滉漾狂來呼馮夷擊鼓送行榜

磁州

客行入昭義平畦羅水田孤鶩唼荇藻清渠開白蓮農
家留我飯散步觀流泉壅泥作斗門蓄泄任自然引之

曲折飛灌溉美前賢念彼塵軫瘁愛此野興偏江南五
月盡新秧碧如烟

邯鄲

我遊邯鄲中日夕歛朱光貰酒歌短歌志氣慨以慷叢
臺在何所平原亦淪亡武安小豎子橫戈此披猖我慕
魯仲連圍城恣襄羊發言不必多提挈宏天綱後有廝
養卒哆口脫趙王房中鼓瑟者莫以薄命傷當時英雄
人豈必定陳張

沙河

黃沙浩何極我馬陷不前百里無羽翰蕭條曠人烟側

足焦原中拊膺起長歎北行冒隆暑孤客增憂煎爬搔
蟲暮嘒顛踣夢晝牽當饗蠅在俎首塗汗流鵠炙官正
司令赤龍行高天遠近堆祝融炙灼到林泉屏翳遁海
底列缺罷施鞭驕陽亢雨澤鬱烝曷由宣行子何足念
農夫泣中田

順德府

諸侯救鉅鹿堅壁懾秦威岌岌新造趙關東繫安危何
來楚將軍百萬在一揮方其渡河時氣已吞王離我行
經戰場弔古生深悲寂寥千載閒夕陽沉鼓旗念彼耳
餘交永爲君子噏

栢鄉

暝投栢鄉縣城闕何齒齒夾道起朱樓倡家此居止趙
女天下無嫉光佇延視嬌悅蠱人心一笑破愁壘夜靜
彈箜篌街月涼于水平原有深情精爽或來此何當倒
千觴馬嘶人又起

趙州喜雨

盛夏久無雨今晨日色陰黑雲下平地殷殷奔雷音頃
刻翻天瓢淋漓透我襟皇靈軫下民不吝一尺霖蘇此
中田禾利同櫟陽金大野走橫潦太行失遙岑涼颼從
北來颯爽悅客心宮中有

聖人端委奏鳴琴

樂城

北風卷亂雲夕陽暖高城酒旆颺微涼蟬聲噪新晴下
馬客欲宿筦簟悽以清假茲道傍雨暫滌塵中纓主人
爲治具方圓陳前楹倉卒逆旅中鷄黍亦鼎烹引滿二
三爵聊用遣我情緬懷同心人萬里共月明

渡滹沱河

我昔遊秦晉北歸渡滹沱今來淹歲月如此流光何城
闕眇雲際西山鬱嵯峨浮氛襲行舟日暮風濤多彌年
役道路百憂集狂歌榮悴不可期佇楫徒咨嗟

真定府

駸駸去馬足飄飄征人衣夏日誰云長儻忽景已西常
山古雄鎮雉堞高參差趙氏亡寶符率然空爾爲俛仰
感今昔寂寞傷別離悽悽投旅店淚落不可揮中夜起
爲詩將以遺所思所思在江南道遠莫致之四顧感孤
子援筆多苦辭

新樂

晨發新樂北栖鳥鳴啾啾紆迴沙路長蕭條風已秋我
生耽寂寞遠行將何求去住制僕夫觀覽不自由回首
古皇臺露氣漫不收策馬絕大河蒼黃在中流守拙營

一巢仰慚林間鳩

定州

弱齡討載籍脊脊放麕翁今來眺中山寂寥邱壠空脩
薄延長坂高柳吟天風踟躕大道傍萬里翔陽紅喟焉
思古人奉義徒無窮

慶都

大雨激如箭行路嗟已難侵晨去慶都六月森薄寒水
蛙聒我後風蟬鳴我前我行非嚴程日午不得餐四顧
曠野外禾黍被平田放牛人不歸一笠破白烟人生困
行役遜此靜者便學海無安瀾經畬無逢年載歌百一

學圃詩集卷十一
詩彌用觸憂端

保定府

中夜萬感集展轉思故鄉南望阻關河黯然斷我腸憶
昨去家日餅中無儲糧明燈治行李揮淚縫征裳嬌兒
立母後問我遊何方三月走梁地六月入燕疆飛沙霽
天宇自怪須眴黃儻忽夏將盡上谷氣已涼思欲夢見
之蟾影悽空房願爲雙飛鵠接翼隨風翔

定興

草樹蔚原薄晨征憩定興我昔爲嚴親對簿此屢經骨
月舍之去僣從棄我行伍伯見陵虐含悽卽前程武陵

柱石姿

謂方伯楊公紹

旬宣翼神京哀我故人子憐我觸繳贈

文書如束筍一一除我名至今心尙悸念之涕泗零寂寂旅舍中悲喜還交縈

涿州

名城翼三輔上有銀榜題呼吸通

帝座控帶莽都畿旅客困行役三五在路岐明發入長安可以浣我衣橐駝夾馳道官柳綠垂垂萬石平不頗皇衢何亨哉前行憩紅亭楹楠崔以巍住僧供茶薜檀施前後來輪蹄無日休塊塏何時開

良鄉

飛廉恐行人人行土囊口飄忽旌旆愁雙埃瞰崇阜流
觀圖經中灰洞無乃有沙合十丈深衮衮石亂走往者
出畿南伏莽戒林藪時和致屢豐此風靖已久賣刀鑄
田廝婦女饁農畝今年定有收快聽樂朋酒

學福齋詩集卷二

雲間 沈大成 學子

脩門詩鈔

雨窗和金壇于殿撰師韻

陰晦兼旬冷逼秋未明顛倒舊征裘窮途有酒堪千日
詩筆何年遍九州天外家山牽別恨風前衣杵動深愁
世間世出終無是雨霽將從季主遊

苦雨

檐溜淙淙聽未休無端一雨入新秋驚回孤燭中宵夢
散作羈人萬里愁宿鳥暗呼林外寺濕螢時墮水邊樓

如何盡說家園好祇見年年賦遠遊

走筆柬朱補園太史

獨夜生秋感孤燈破雨寒艱辛來遠道寂寞滯長安
酒邀沉飲拈書許借看舊交公叔在頓使客懷寬

秋杪同秀水徐簡畦進士張南亮外兄朱貯充表
甥登陶然亭

縹緲孤亭倚碧空塞山宮樹兩冥濛人行野水平蕪外
秋在寒烟落照中萬里間關來冀北一時悵望憶江東
年光總向風塵老輸與荒畦賣菜翁

澤州陳濂村憲使筵奉和殿撰師卽席之作

舊識題襟雅今知投轄豪燈明連座客月小出雲高百
罰喧金琰千言赴綵毫幸陪壇坫末推激振風騷

不寐

秋來屢失五湖期秋夜沉沉有所思蟲語入窗人倚枕
月痕在地樹橫枝誰家擲笛翻新譜何處挑燈覆舊棋
觸忤羈愁頻不寐異鄉無賴是深卮

再歐族父邸第醉後留宿得四絕句

天街漠漠月舒波把酒論詩一夕過回首江南秋又老
重陽漸近雨風多

昔夢尋思轉惘然浪傳服食致神仙瓜皮艇子搖雙槳

一醉西湖抵萬年

詞伯陳髯有盛名當年曾此訂同盟閑抽架帙君詩在

腸斷空庭落葉聲

齋中偶見故人錢唐陳瑤嶼詩集內有贈余詩

年少狂踪記廣陵杜郎近日已如僧甘橋明月渾無賴
冷浸秋雲一萬層

雜詩十二首偕范瀛山同作

離離雲中雁肅肅來長城驚風失其羣萬里還孤征我
行步庭除仰視淚縱橫非無遠去志羈旅多苦情舟楫
夙已具江海何時盈

長安十二衢遠近王侯宅王侯喜貴遊襍沓羅賓客庶

羞出中厨長筵設重席美人夜歌舞宛轉流薌澤誰云
四氣同寒暑頓爲隔失笑窮巷儒苦吟永朝夕

清晨掩閨臥密友二三來招我遊別墅曰此多亭臺坐
久耳目異懷抱斯須開曲池波已涸木石亦云摧秋風
叩虛牝蕭瑟有餘哀

秋夜何寂寞白雲含圓暉起行步園中零露濕我衣我
衣故人贈日久顏色非時節授寒服鶉結取世譏不惜
我衣敝所嗟故人稀

庭前有棗實丹翠何離離元穹激迅商一夕脫高枝展
轉泥沙中或來近階墀飽食棄其餘見收終無期微物

一失所去留隨人施

相如工詞賦意氣陵青雲當其雜傭保見輕卓王孫一朝乘傳來縣令清路塵所患非周才寧嗟久賤貧擊劒動武皇鼓琴娛文君人生感知已功名安足論

廣路揚遠埃脩軫紛四征故人從此別尊酒罄平生衆星何微茫遠近晨鷄鳴牽衣上河梁忽復萬里行萬里阻且長南望感吾情安得傾天漿一以濯君纓

何來一佳人顏色若桃李脂車偶出遊觀者空都市婉彼陌上花春風吹未已要之絕世姿脩飾爲誰使

劉伶頌酒德非無用世情雲羅垂八紘聊以飲爲名俯

仰天地間瓦缶亦雷鳴引杯已頽然何知醉與醒

步登城東坂藁葬多新墳嗟爾墳中人枕藉何紛紜白
楊鳴枯枝鴟梟啄水濱斷碣仆草間姓氏杳不分閨人
日夕啼隔絕曠音塵豈知北邙山愁雨堆荒燐

鷺鳥送樊籠舉翮觸四週人生處逆旅發言聚百尤齒
以剛而亡不如舌爲柔西隣有愚公吾將從之遊

仙人浮邱伯拂衣海上來授我不死藥流霞滿金杯飲
之生六翮斯須脫塵埃矯首扶桑宮崢嶸金銀臺去去
樂無極毋爲愴中懷

商家林感賦

人烟何處歷首路指滄瀛莫角尊前動寒雲林外平枯
魚驚昔夢烏鳥感孤生暗壁猶題句重看淚滿纓商家林村
口卽青縣大路成痛遭先君之故攝赴臺鞠嘗往來于此

晏城懷古

攘臂崔山日無能救國危倣裘猶古貌近市此荒祠計
左仇三士名齊媿四維從來譏覆餗不必定委蛇

潘村

雪後潘村路驚沙慘客顏北來經數驛南下阻重山北來
行旅自樹杪鷄羣宿田間特獨還頻年困行役却羨野
人閑

泰安州謁嶽神廟

嶽山青到地玉殿出層雲河濟檐前落燕齊天外分空
廊圖鬼物繡幔隱神君寂寞東封頌穹碑蝕蘚文

宿羊流店

野店客投宿宵分獨倚欄却憐江月好猶向嶽雲看爭
棧馬駒惡過窗雁語寒美人眇天末延佇觸憂端

新泰

驅馬過新泰風前十丈塵大堤平若水獨樹遠疑人排
闥澆村酒哦詩墊客巾無爲嗟逆旅瓠落本閑身

熬陽

山雲忽已暝一徑入潞陽雉起白楊塚犬鳴黃石墻乾
坤何鼎鼎歲月自堂堂魯酒沾唇薄還能引我狂

蒙陰

彌望離離石東蒙寒景斜逢人誇積繭與客品新茶一
水紆羅帶羣峰秀髻了却憎嵐氣重頭癭滿山家

沂州曉行

臈膊鷄聲動縱橫馬足忙平沙連積水遠樹透微陽漸
與家鄉近轉嗟道路長使君新領郡符竹有輝光

爲府卽以
見官廨任

紅花埠

官道在沮洳人家編竹居野田翻水牯小市上河魚北
下黃塵斷西飛白日虛岸頭歸去客立馬獨踟躕

宿遷

客行下相道村落幾家存樹影經秋瘦河流到海渾亂
帆空際沒寒日晚來昏津吏徒勞問空囊漬酒痕

淮安

路入淮陰郡長堤踏臥虹城窺野水外帆趁夕陽中精
爽韓侯在蕭條楚塞空天邊有鴻雁一一叫西風

渡江

西風吹積雪皆上妙高臺京口酒堪飲須傾三百杯寒

雲開復合東雀去還來清景今朝好橫江亦快哉

惠山道中有懷劒光老人秦樹峰

惠山青似沐倒景入橫塘朔雁遠隨客吳音漸近鄉繁
霜侵釣石清夢過書堂延佇同心友茫茫水一方

青浦

歸路葦城三十里尊前燈穗落銀缸鐘聲近出青龍寺
水氣平沉白鶴江雨雪長途憐襍被親知軟語接船窗
是日鄉人迂王黃門者踵至九峰明發晴如畫喜見雲林鳥一雙

過詩境謁黃宮允師

建業東風送遠行拜違講席已周星深杯醇酎重浮綠

列郡圖經早殺青

省志已竣事

過歲無憂梅繞屋討春有信

雪盈庭嶺南驛使催征客萍跡蓬心總淚零

喜晤王延之俞克友

密友分張忽判年相逢道故倍歡然江湖憔悴嗟予拙
骨肉騰飛讓世賢書法舊推鍾丙舍詩名重見謝臨川
王工古詩俞撫魏晉人書皆力矯時趨者柴門月色仍如昨搔首何堪醉問
天

袁約之過訪寒齋酒後各訴情事因題長句

袁虎衝泥過訪頻焚枯蕢酒頓忘貧屋頭急雨渾疑夜
籬落孤花欲漏春舊約嵩陽詩漫漶新愁谷水話酸辛

學福齋詩集卷二
人生豈得長相聚
早晚征車碾路塵

學福齋詩集卷二終

學福齋詩集卷三

雲間 沈大成 學子

嗽荔詩鈔

去家日示內

貧賤依人事可傷
突黔席煖兩荒唐
樓頭我已同王粲
廡下君真學孟光
好把刀環占夜月
莫因膏沐怨朝陽
廣州此去書頻寄
珍重南來雁一行

留別弟大受

吳門幸舍嶺南船
兄弟飄零倚硯田
故里暫歸剛匝月
殊方此去幾經年
虎山夜市風迴雪
蠡渚春帆水拍天

漫向岡頭苦相望怕寒蒙被不能眠

泛泖

東方發白吐朝暾一夜孤舟斷客魂二十五年重泛此
岸沙依約舊時痕

一水微茫大小蒸

大蒸小蒸泖邊村名

人家寂歷曉雲層鷓鴣飛

過平蕪去瞥見漁郎來起罾

過楓溪欲訪曹白村竟迷其處因憶庚戌初春偕
陳丈洛亭問梅鄧尉曾憩草堂酌酒論詩若前日
事而陳墓草已宿矣緬漢上之題襟傷山陽之聞
笛何以爲情收淚書此

萬堆香雪十分春彈指良遊已隔塵豈意獨乘青翰舫
可憐重憩白牛津柴門月色曾留客茂苑風光不借人
此去北枝開未落尋思朋舊欲沾巾

嘉興

布帆又卸語兒亭漁笛村歌動客聽寒月無情沉浦暗
莫山作意出雲青千年勝蹟高樓在烟雨樓一代詞人宿

草零

謂竹垞青士諸先生

乍去鄉關衣帶緩愁予最是酒初醒

吳山懷古

半壁臨安業已灰紅霜飛盡客重來湖山表裏雄圖在
城堞參差落照開霸府有祠存帶礪表忠觀故宮無地長

蒿萊

宋宮故址
皆爲市廛

悽風吹斷銅人淚併作西陵松柏哀

王黃門偕遊西湖自問水亭放舟冒雨尋湖中諸勝

烏榜衝波去不停濕雲含雨暗前汀水連天末荒荒白
山到堤邊漸漸青遠近樓臺皆設色二三賓友舊忘形
直須買盡餘杭酒爛醉西湖不放醒

登孤山放鶴亭

處士芳踪不可尋空餘抔土占山林孤舟歸去月初墮
雙鶴飛來雪已深浮世功名同敝屣荒祠香火有知音
却憐种放東封後澗媿林慚直到今

聖因寺

鸞輅南巡湖上遊
昆吾御宿闕林邱
金銀自與

皇居近花木
真成佛地幽

高廟衣冠瞻率土
諸天梵唄落寒流
征夫賸有攀髯淚
白露黃山入莫愁

湖舫留題六絕句

罨畫波光日日殊
小航高屐足歡娛
笙歌葛嶺春如沸
斷送南朝是此湖

花神祠廟新營建
靈璫倉琅倚碧虛
大字塗金題勝在

浙西節使李尚書

彭城李公在浙日大脩西湖諸勝因創建花神廟亦佳話也

學正齋詩集卷之三
畫船到處水漫漫一片西湖倚棹看斜卷酒旗深柳外
也隨風雨賺人寒

明月舒波酒琰前昔遊如夢故依然舊家池館新邱壠
不到西湖已十年

余于癸卯中秋曾遊湖上

五柳居前莫景寒遊人覓句鎮凭欄榴皮畫壁留題在
莫作旗亭一例看

燕市東風十丈塵開尊每話六橋春到來不見陳驚座

誰與湖山作主人

謂陳瑤嶼

富陽度歲

爆火喧城郭推蓬已泊船江山留過客風雨送殘年菜

甲登盤脆桃符比屋鮮故鄉有兒女悵望話燈前

富陽元日偕同行諸公飲春江第一樓分賦

異鄉逢令序良友共深杯
萬里方當去一年又復來
江聲皆入市雪意獨登臺
花事今春早東風火急催

是日
卽立春

嚴陵瀨

萬古嚴陵瀨荒祠閉客星
疎林穿晚照危石戴孤亭
波疊層層碧山開面面青
往來憑弔者塵夢幾人醒

嚴州道中

嚴州山更好所惜少春暄
峽色連雲暗灘聲挾雨喧
曉

寒欺薄醉宿火戀餘溫望望桐江上蒼茫失遠村

衢州

三折清流遡欲窮輕舟猶在翠微中鼓喧野廟團春社
郡有周宣靈王廟報賽最盛波嚙浮梁鎖晚風鄉夢不因千里隔詩
情幸賴一尊同南行那似衢州好嫩橋明燈照地紅

自常山至玉山陸行得句

筍輿乍上覺身輕動地東風弄曉晴山市戎戎初過雨
春禽一一自呼名依微雲影隨人遠取次梅花賺客行
莫笑草坪頻歇脚越山如黛正含情
草坪去玉山四十里行旅皆飯于此

弋陽元夜

元夕今宵興不同
葢頭風雪冒寒蓬
數家臨水孤城下
萬里依人半路中
隔座酒波浮蟻綠
傍船燈火鬧蛾紅
遙憐兒女門前劇
定話征夫類轉蓬

○貴溪感賦

秘祝青詞日幾封
君王端拱御齋宮
同時議禮人皆去
獨與文成宿禁中

江西馬駒踏殺人
江西大鷄不可親
中書會食百僚退
下箸猶傳丞相嗔

欲驅殘寇安三輔
此舉桑榆自足多
坐棄河湟七百里
國家偃武奈公何

桑梓何無香火情身居政府便相傾漢家青史流傳在
東市朝衣惜寶嬰

鄱陽湖

鄱陽湖面大風號鉦鼓康郎血戰勞當日驅除同勝廣
後人感慨到蕭曹百年陵谷龜鼉徙五夜精靈波浪高
獨有小姑仍未嫁我我雲髻向征舸

萬安

萬安城下浪如屋萬安城上雨如塵花稀柳暗催春色
江盡灘生恐旅人野岸紙鷁風跋扈叢祠石虎血嶙峋
江西神廟前皆有石虎祭者漚牲血于上西江土俗猶繁庶社鼓隆隆接比

鄰

十八灘

世路多奇險何嗟十八灘
舟隨魚尾擲石齧虎牙寒
上水行宜易衝風去倍難
平生仗忠信一笑歷驚湍

贛州

章貢北流千疊水粵閩南限一重關
風吹深峽蛟龍鬪日落高城虎豹閑
出險今朝堪把酒望鄉何處祇看山
推蓬喜聽弓弦響叢竹驚飛雉子斑

韶州

重瞳曾駐蹕臺觀尙臨江
埤堦環千室城上女牆皆民居
帆檣

下六瀧

樂昌諸瀧皆由此入江

猗姬花外過帝子月中降東嶠春

方好紅棉照玉缸

出峽

鑿翠捫仙徑飛紅結梵宮天扃三峽外江束萬山中帝

子書臺遠名王戰艦空

峽中舊多磯礁壞舟向可喜下粵日皆平之

都來成

一笑巖際鳥呼風

初之廣州題西齋壁

西齋真十笏僻遠愜吾襟老樹皆空腹春蕉未展心瘴

鄉宜卯飲狂客愛宵吟鴻雪原無著何須擇茂林

海珠寺

波面一珠湧龍宮出水飛大旗番鬼舶高壘佛郎機雲
盡乾坤濶潮來島嶼微蒼茫南極下斜日滿征衣

海幢寺

仙梵春帆外精藍積水中龍涎烝海氣鷹爪簇花叢寺有

鷹爪蘭江客同參在澹歸禪師受法于此商胡重譯通白頭洪覺範

泣話羽陵空寺藏詩僧集最多近已無存

鎮海樓在粵秀山之左洪武初永嘉侯朱亮祖所建樓凡五層上切星辰制度雄麗域內鉅

觀也

飛樓高瞰海上將昔曾凭拔地入千尺排雲一萬層倒
茄承藻井栖爵墮觚棱甲觀西京盡興亡感老僧

南海神廟木棉花歌

波羅廟中木棉花南人恒向北人誇炎官屋角張火繖
神王天半奔雷車黃木灣頭扶胥口時出光怪爲花守
春風催花花欲開銅鼓隆隆鬼物走青草瘴昏三月時
此花此時紅離披千年重發鶴林樹一手亂拘扶桑枝
攢頭跼萼何灼灼日月出矣列巨燭聞思大士海上來
隨風散墮萬纓絡又如身入蓬萊宮翦采裂繪羣娃中
七寶莊嚴發奇豔呼龍酌酒勞祝融憶昔劉郎斷嶺道
百花秘殿爭巧笑靜江清海風散雲野廟繁英獨四照
年年歲歲餞濃春么鳳飛鳴冷夕曛堆絮滿庭慘顏色

江東過客欲銷魂

春莫由廣州復之南雄上水行緩船窗多暇卽事
抒懷雜題絕句二十四首

美人埋玉已成烟塚上啼烏客泣然一片素馨青不斷

春風送我過花田

花田去廣州十里南漢
王葬美人媚珠于此

蠻女龍郎日往還高桅艇子白波間祇須牢把當艣

不怕狂龍吹裂山

粵人以春風大爲狂
龍卽我吳蠻東風也

佛山市舶澳門商百貨紛來自外洋見說每年五六月

白蠻黑鬼盡紅裳

澳門在香山縣番人聚居處也每年
以夏初至佛山互市其人有白黑二

種

輕舸重舸滿江邊十里春帆燈火連首尾卷如大荷葉
駭人最是廣西船

海門潮信白浮天潮水能爭峽水先月起四更潮正上
長年打火喚開船

牂牁從此到厓門春水平沉白塔村吞吐三江喧晝夜
岸頭已失舊潮痕

牂牁江自廣西出肇慶羚羊峽至三水縣會湏綏二江入海每年春水暴

發潮信至此而止
厓門在新會縣

江抱春山山抱城江山清遠不虛名前行漸覺青天狹

一路芙蓉相對生

清遠縣當峽門之口

峽徑倚樞鳥道通緯夫騰藉上天同絕憐春水鴨頭綠

徐引蘭舟行鏡中

仙人臺榭挂雲松石磴天梯裊似龍誰向峰頭發清嘯

一聲裂盡玉芙蓉

飛來寺在中宿峽人
偶發聲四山皆響

三春三峽總飛泉大廟前頭萬瀑懸路轉蒼厓船不見

唯聽篙響白雲邊

大廟居三峽之中
此地瀑布尤盛

十日曾無一日晴峽風不放峽雲醒摸魚便是霖鈴曲

長使征人掩淚聽

摸魚歌粵人所製其聲凄
惋短促蓋古竹枝之變也

浣洸聚落濕雲屯野廟荒涼對水濱一代紅顏驚過客

繡旂曾走萬黃巾

連州江口卽古浣洸地唐寨將虞夫
人破黃巢于此土人立廟祀之宋封

惠妃甚

靈顯

何年鬼斧開三峽亂劈南天無數山碎落英州成怪石

平移縣圃到人間

英德縣中皆以賣石爲市

峽行日抱玉妃遊峽到滇陽景倍幽石乳高飛千尺雨
藤花亂落一天秋

片石臨江號望夫江流不轉淚痕枯幾曾一聽哀猿嘯

腸斷春山叫鷓鴣

峽中猿種久絕凡詩所稱引皆妄譯也望夫臺在英德縣北三十里

石罅玲瓏一閣懸晨鐘夕唄落潺湲劉郎自願東京去

不向空山作杜鵑

碧落洞

十丈高帆此倒飛驚濤噴激濕人衣巉崿一壁當船出

最怕經過彈子磯

苦竹叢中野雉飛老榕樹底行人稀溪烟山雨增愁寂
村女兩三來浣衣

微月奔雲深峽暗大風卷燒滿山香平沙晾網不收拾
漁戶數家茆葢牆

風俗南中作趁墟朝來成市晚來虛客舟經過常停櫓
去買新鮮大草魚

粵人以市爲墟如
北方趕集之類

簞笠周遮見面稀孱顏下上捷如飛春山處處成樵徑
村女擔柴行翠微

高岡寵嵒戍旗斜屋脊林端露幾家無數青山若屏障

中開一罅去丹霞

進仁化江口卽丹霞
山澹公開法道場也

黃塘以北盡沙塍急水衝沙沙漸崩一半變成江畔石

螺紋蜺影尙層層

黃塘近南
雄驛名

漸近南雄江路重茶園竹垞接城墉好山嶺下曾相識
迎客青青有數峰

學福齋詩集卷三終